

Primera carta de San Pablo a los TESALONICENSES

Tesalónica macanare Cristore ajitirūnūrāre ī babarā rāca Pablo
ī ucacōare queti

1 1 ¿Nati Jesús ocare ajitirūnūrā, Tesalónica macana? Yu Pablo, yu babarā Silvano^a, Timoteo rāca adi quetire mūare ucacōaja, Dios mani jacu, to yicōari, mani ɥju Jesucristo yarāre. Diore mūare sēnibosaja yua, “Īnare ĩamaicōari, ejarēmōñā mū’, quēnaro ĩna ñarotire yigu”.

“Mua bajisere tūoīacōari, ‘Quēnaro yaja mū’ Diore ĩre yivariquēnaja yua”, Pablo ĩ yire queti

2 Tocārācajine Dios mani jacure ĩre sēnirā, mua jediro mua bajisere tūoīacōari, “Quēnaro yaja mū”, ĩre yisēnirūgūaja yua. **3** Ado bajiro bajirā mua ñajare, to bajiro yirūgūaja yua: “Yua-re ejarēmōmɥcɥmi” Diore ĩre yitūoīarā ñari, quēnaro yīñaja mua. Gāmerā mairā ñari, gājerāre quēnaro ejarēmōrūgūaja. “Mani ɥju Jesucristo ĩ tudiejaro bero, ĩ rāca rijamenane ñarū-gūrharāja”, yitūoīa tujabeaja mua. To bajiro tūoīarā ñari, rojose tāmōrūgūrā ñaboarine, “Yua-re ejarēmōmɥcɥmi”, ĩre yitūoīa tujabeaja mua. To bajiri, to bajiro mua bajise Dios sūori ti bajijare, “Quēnaro yaja mū”, Diore ĩre yivariquēnaja yua. **4** To bajiro Diore yaja yua, mani ɥju yarā ado bajise mua bajisere masirā ñari: Dios ĩ ĩamairā, ĩ beseriarā ñañuja mua. **5** “To bajiro mūare yiyumi Dios”, yimasajaja, ado bajiro bajicati ti ñajare: “Jesús ĩ rijabosare sūori manire ĩavariquēnaami Dios” yire quetire yua gotimasiojama, yua masune tūoīarujeocōari, gotirā me mūare gotimasiorūgūcaju. Dios ĩ rotise rāca mūare

^a1.1 Silas ti yijama, griego oca rāca yiyuju. Silvano ti yijama, latín oca ñañuju. Hch 15.22; 18.5 macaña.

gotimasioçajũ yua. Dios ã cõagũ Espíritu Santo sũorine tuoĩacõari, “Socase me ñaja”, yimasioçajũ mũa. Mũa rãca yua bajiñacatire masicõari, “Quẽnaro mani ñarotire yirã mani tũjũ eçajuma”, yũare yimasirãja mũa.

6 To bajiri mũa quẽne, yua yicatire bajirone quẽnaro yirũgũçajũ mũa. To yicõari, mani çjũ Jesús ã yiriarore bajirone yirũgũçajũ mũa. To bajiri bajicatore bajirone rojose tãmũo-boarine, “Variquẽnato” yigũ, Espíritu Santo mũare ã ejarẽmocatĩ ñajare, bũto ajivariquẽnacajũ mũa. **7** To bajiro mũa bajiñacatire ajicõari, mũa ye sitana Macedonia ñarã, adoana Acaya sitana quẽne, “Ĩna bajiñariarore bajiro yiroti ñaja manire”, yama ĩna, Cristore quẽnaro ajitirũnũrã jediro. **8** To bajiri mũa gotimasiose sũorine mani çjũ Jesús ocare ajiyuma Macedonia sitana, Acaya sitana. ĩna rĩ mere, gajeroana jãjarãre gotimasioñuja mũa. Quẽnaro mũa yirere ajicõari, “Cristore quẽnaro ajitirũnũrã ñaama Tesalónica macana”, mũare yama. To bajiro mũa bajisere jẽre ĩna masicõajare, gajerojũ yua vacudijama, mũa bajisere gotibetirũgũaja yua. **9** ĩnajua roque yũare quẽnaro mũa yicatire gotirũgũama. “Ado bajirã ñarãma” mũa masune yiquẽnorujeocõari, mũa rũcũbuoobarere yitũjacõari, Dios catimũorũgõrocũjũare mũa ajitirũnũsũocati-re gotirũgũama. **10** Gajeye ado bajiro mũa gotisere yũare gotirũgũama: “Dios macũ Jesús, ã bajirocaro bero, Dios ã catiorĩ, õ vecajũ ñagũmi. ĩ ñaami rojose mani yise vaja rojose tãmũotũ-jabetiriarojũ manire Dios ã reacõaborotire manire yirẽtobosarocũ. To bajiro yirocũ ã tudiejarotire yurã yaja” mũa yĩnasere quẽne yũare yigotirũgũama ĩna.

Tesalónica macana rãca Pablo ã bajiñarere ã gotire queti

2 **1** Yua mairã, mũa tũ yua bajiñacatire tuoĩacõari, “Bũto quẽnacajũ”, yimasioçajũ mũa. **2** Mũa tũjũ yua ejaroto rĩjoro, Filipos ĩna yirimacajũ ñacajũ yua. Tojũ yua ñaro rojose yũare yicama. Mũa ya macana quẽne yũare gotirotibetiboacama. Jẽre tire masioçajũ mũa. Yũare ĩna gotirotibetiboajaquẽne, Dios ã ejarẽmose rãca mũare goticõaçajũ, Dios oca Jesús sũori quẽnaro ã yise quetire. **3** Socasere ajirũcũbuorã me ñari, tire mũare goticajũ yua. Rojose yirũarã me, mũare goticajũ. Mũare yitorũabeticajũ. **4** “¿Yũ bojarore bajiro yirã ñati?” yigũ, yũare rotiicõari, variquẽnañumi Dios. To bajicõari, “Yũ macũ sũori

quēnaro yu yise quetire gotiruarāja mña”, yuare yirotiyumi. To bajiri ī gotirotirote bajirone gotirūgūaja yua. “Masa ajivariquēnato” yirā me, gotirūgūaja. “Dios ajivariquēnato” yirā-juā, gotirūgūaja. **5** “Oca quēnase rāca yuare yitorā me yama”, yuare yimasicaju mña. “Gājoa manire īsiato” yirā me, mñare goticaju yua. Tire masiaja mña. Dios quēne, tire masiami. **6** “Ñamasurā ñaama’ yuare yato” yirā me, mñare goticaju yua. Noajuane, “Manire rūcūbūoato” yirā yua goticana manicama. **7** Mñare rotibeticaju yua. Cristo ī cōarā ñari, yua rotijaquēne, quēnacōaboariaroja. To bajiboarine, sīgō rōmio so rīacare so īatirūnūrore bajiro mñare īatirūnūrūgūcaju yua. **8** To bajiro mñare īamairā ñari, “Cristo ye quetire īnare gotimasioruarāja”, yitūoīa variquēnarūgūcaju yua. Ti rī mere yivariquēnarūgūcaju yua. “Manire īaterā manire īna sīaroti ti ñaboajaquēne, īnare gotimasioruarāja”, yivariquēnarūgūcaju yua, mñare īamairā ñari. **9** Yua mairā, mña tū ñarā, buto josari yua moarūgūcatire masiritimenaja mña. Ūmña, ñami quēne moarūgūcaju yua. Toju mña tūju yua ñase vaja, yua base vaja quēne yuare mña vaja yibosajama, josaboriaroja ti, mñare. Tire masirā ñari, “Vaja yibeticōato īna” yirā, Dios oca gotirā ñaboarine, gajeye moare yua masune moacōari, bare vaja yibarūgūcaju yua.

10 Mña tūju ñarā Dios ī bojarore bajiro quēnaro yirūgūcaju yua. Tojūre quēnaro riojo yirūgūcaju yua. To bajiri socamene, “Rojose yicama” yirā manama mña tū ñarā. To bajiro yua bajicatire īacana ñari, “īna yicatore bajiro yirūgūcama īna”, yuare yīñagōbosa masiaja mña quēne. Dios quēne tire yuare yīñagōbosa masigūmi ī. **11** “Rīa cutigū ī rīare maigū, tocārācūre quēnaro ī yirore bajiro manire yirūgūcama īna”, yuare yimasiaja mña. **12** Rojose mña tāmūojama, mña tāmūobetijaquēne, quēnaro mñare gotimasiorūgūcaju yua, “‘Manire ejarēmōrucūmi’ Cristore īre yitūoīa tūjabeticōato” yirā. “Dios ī bojarore bajiro mña yisere buto bojaja yua”, mñare yirūgūcaju yua. Dios ñaami rētoro ñamasugū, quēnaro rotigū, “Yū tūju ñaruarāja” mñare yigū.

13 Gajeye ado bajiro mña bajicatire tūoīacōari, “Quēnaro yaja mñ”, Diore īre yisēnirūgūaja yua. Dios oca mñare yua gotimasioctatire ajicōari, “īna masune tūoīacōari, gotirā me yama” yimasicōari, yuare ajitirūnūsuocaju mña. To bajiri

socase me ñaja Dios ye yua gotimasiorũgũse. To bajiri, tire quẽnaro ajitirũnũjama, Dios ĩ bojasere yirã ñaruarãma. **14** Yua mairã, ti ocare ajitirũnrã mua ñajare, rojose mũare yiyuma mua yarã. Mua yiecorore bajirone yiyuma judío masa quẽne, ĩna yarã Jesucristo ocare ajitirũnrãre. **15** ĩna yarãne ñaama Cristore s̄ariarã. Rĩjorojũ Diore gotirẽtobosariarãre quẽne ĩnane s̄ariarã ñaama ĩna. Yũare quẽne tudírã, varotica-na ñaama. To bajiro yirã ñari, Dios ĩ ĩavariquẽnamena ñaama. Jediro masare ĩaterã ñaama. **16** Judío masa me rojose tãmuotũjabetiriaroju ĩna varotire bojamena ñari, Dios ocare gotimasiorũaboacaju yua. Yũare gotimasio rotibetirũgũama. Rẽmojũne, rojose rĩne ĩna yicõasũoadire ñajare, to bajirone bajiaja adirodore quẽne. Rojose ĩna yitũjabetijare, rojose ĩnare yicõagũ yami Dios yuja.

Tesalónica macajũre Pablo ĩ tudivarua tũoĩare queti

17 Yoaro mene quẽna mua tũju yua tudivarotire gotirũaja yũ. Yua mairã, mũare yua vadiveocato bero, mũare ĩabetiborine, tocãrãcarũmũre mũare tũoĩacõa ñarũgũaja. To bajiri, mũare bũto tũoĩarã ñari, mũare ĩarã varuarũgũboacaju yua. **18** Yũ masu quẽne cojoi me mũare ĩagũ varuarũgũboacaju yũ. Tocãrãcãjine mua tũju ĩarã yua varuacõarore, “Ejabeticõato” yigũ, rojose yũare yirũgũñumi vãtia çju Satanás. **19** Mani çju Jesucristo ĩ tudivado yua ĩorona mua ñajare, mũare ĩarã varuacaju yua. “Mũ oca ĩnare yua goticati ñajare, mũre ajitirũncama ĩna”, Cristore ĩre yĩovariquẽnaruarãja yua. To bajiro yua yiroti ti ñajare, Jesús ĩ tudivadirotire bũto tũoĩavariquẽnaja yua. Gãjerãre yua tũoĩaro rẽtoro mũare tũoĩavariquẽnaja. **20** Socarã me yaja yua. Cristore mua ajitirũnũsere bũto tũoĩavariquẽnaja yua. Tire ĩre gotivariquẽnaruarãja.

3 **1-2** To bajiri, ĩarã vabeticõari, mua bajisere ajiruarã ñari, yua maigũre, Dios ĩ bojase yigũre Timoteore toju ĩre cõacaju yua. Yua rãcagũ, Jesucristo ocare masare gotimasiodigũ ñaami ĩ quẽne. To bajiri, “Quẽnaro ĩnare gotiba mũ, ‘Manire ejarẽmorũcũmi’ Jesucristore ‘ĩre yitũoĩa tũjabeticõato ĩna’ yigũ”, ĩre yicõacaju yua. Yũjũama, Silvano rãca tũjacaju yũ, Atenas vãme cũti macarema. **3** Rojose tãmuorã ñaboarine, “Tire sutiritibeticõato” yirã, ĩre cõacaju yua. Masiaja mua: Cris-

tore ajitirũnũrã ñari, rojose tãmuoroti ñaja. **4** Mũa rãca ñarãju, cojoji me ado bajise mũare goticaju yũa: “Cristore ajitirũnũrã mũa ñajare, rojose mũare yiruãrãma gãjerã”, mũare yicaju yũa. Mũare yũa goticatore bajirone bajiyuja ti. **5** To bajiro ti bajijare, ado bajise mũare yitũoĩarejaicaju yũ: “¿Cristore ajitirũnũcõa ñaboati ña? Vãtia ẽju Satanás, ‘¿Cristore ajitirũnũbesa’ yiroti-betiboati ñ? To bajiro ñ yisere ña ajijama, yũa gotimasioboacati-jũare ajitirũnũ tũjarũarãma”, yitũoĩarejaicaju yũ. To bajiri, tire masirũ, mũa tũju Timoteore ñre cõacaju yũ.

6 Mũa tũju ejarĩ, adoju tudiejami quẽna. Adoju ejacõari, mũa bajise quetire oca quẽnasere gotitudiejami. “Cristore ñre ajitirũnũcõa ñaama ña. To yicõari, quẽnaro gãmerã ñamaicõa ñaama”, yimi. “‘Mũare quẽnaro tũoĩaja yũa’ yima ña”, yũare yimi. “‘Ñare mani ñarũaro cõo manire ñarũama ñajũa quẽne”, yũare yimi Timoteo. **7** To bajiro ñ yijare, Cristore ñre mũa ajitirũnũcõa ñasere ajicõari, bũto variquẽnaja yũa. Gãjerã suori bũto rojose tãmuorã ñaboarine, tire ajivariquẽnaja yũa. **8** To bajiri, Cristore ñre mũa ajitirũnũcõa ñasere ajicõari, bũto variquẽnamũ yũa. **9** Mũa bajisere tũoĩavariquẽnacõari, “Quẽnaro yaja mũ”, Diore ñre yisẽni tũjabetirũarãja yũa. **10** Ɛmũa, ñami quẽne, ado bajiro ñre sãnirũgũaja yũa: “‘Ña tũju ejato’ yigũ, yũare yirẽmoña mũ”, ñre yirũgũaja yũa. “‘Bũtobusa Cristore ajitirũnũato’ yirã, ña masibetire ñare yũa gotimasiortore yigũ, yũare yirẽmoña mũ”, ñre yirũgũaja yũa.

11 To bajiri ado bajiro mani jacũ Diore to yicõari, mani ẽju Jesucristore yisẽniaja yũa: “‘Ña tũju ñarã vajaro’ yirã, yũare ejarẽmoña”, ñare yaja yũa. **12** To yicõari, ado bajise mũare sãnibosaja yũa: “‘Bũtobusa gãmerã ñamaiato ña’ yirã ñare ejarẽmoña”, ñare yaja yũa. “‘Gãjerãre quẽne ñamaiato ña’ yirã, ñare ejarẽmoña”, yaja yũa. “‘Ñare yũa mairõre bajiro maiato ña’ yirã ñare ejarẽmoña”, ñare yaja yũa, mũare sãnibosarã. **13** To bajiro mũa maijama, rojose mũa tũoĩasere “Yitũjacõari, quẽnase rĩne tũoĩato” yigũ, mũare ejarẽmogũcũmi Dios. To bajiro mũare ñ yijama, mani ẽju Jesús ñ yarã rãca ñ tudiejarirũmũ, mani jacũ Dios ñ rĩjorojũa ñie rojose mana ñarũarãja mũa. To bajirone bajiato.^b

^b 3.13 2 Ts 1.7, 10.

Dios ï ïavariquēnase queti

4 1 Yua mairã, gajeye mware gotirujaja yua. “Ado bajiro mua ñajama, mware ïavariquēnarucumi Dios”, mware yimasio-cajũ yua. Tire ajicõari, quēnaro ñañuja mua. To bajiri, Dios mware “ïavariquēnato” yirã, butobusa ï bojasere mua yisere bojaja yua. Mani ujũ Jesucristo to bajiro yware ï yirotijare, to bajiro mware yaja yua.

2 Mani ujũ Jesús ï roticatore bajirone mware yua roticature masiaja mua jēre. 3 Ado mua bajisere bojaami Dios: Dios yarã mua ñajare, quēnase rīne mua yisere bojaami. Manajo cutirã, manajũ cutirã, manajo mana, manajũ mana quēne, mua gãmerã ajeriarã cutisere bojabeami. 4 Manajo cutigũ, ï manajo rãca rīrene gãjerãre ajeriarã cutibecune, rucubuose rãca ñie oca mano ï yĩñajama, quēnaja. 5 Diore masimena ñari, ïna bojarore bajiro ajeriarã cutirũgũama. Ñnare bajiro yibetirũgũña. 6 Ñnare bajiro mua yijama, buto rojose mware yirucumi Dios. Jēre adirene mware goticajũ yua. 7 “Rojose yirã ñato” yigũ me, “Yũ yarã ñato”, manire yiyumi Dios. “Quēnasejua yato” yigũ, to bajiro yiyumi. 8 To bajiro yigũ ï ñajare, adi yua gotimasiosere ajimena yua rĩ mere terãma. Diore quēne terãma ïna. Rojose mani yisere “Yitujato” yigũ, Espiritu Santore manire cõañumi Dios.

9 “Gãmerã ïamairoti ñaja” mua yimasiro-tire jēre mware ejarēmoñumi Dios. To bajiri yuama, “Gãmerã ïamaiña mua”, mware yiuacõabeaja. 10 Quēnaro yirã ñaja mua. Macedonia sitana Cristore ajitirũnrãre ïamairã ñañuja mua. To bajiro yirã ñaboarine, butobusa ïnare mua ïamaijama, quēnaruroja. Yua mairã, to bajiro mua yiro-tire buto bojaja yua. 11 Ñie oca manone quēnaro ñaruarãja mua. Gãjerãre gõjanabiome-nane, mua moasere moacõa ñaña. 12 To bajiro mua yijama, mware ïacõari, “Quēnaro yirã ñaama”, mware yĩarũcuburogarãma Cristore ajitirũnmena. Ñiejua ruyabetiruroja, mware.

Mani ujũ Jesús ï tudivadiroti queti

13 Yua mairã, Cristore ajitirũnrãre bajireariarã ïna bajiro-tire mware gotirã yaja yua. Diore masimenama, bajireariarã ïna bajisere riojo masibeama ïna. Bajireariarãre tuoïacõari, buto sutiritiama. “Quēna tudicatioaruarãma”, yituoïarã me

ñaama. Ìna tuoĩarore bajiro m̄ua tuoĩasere bojabeaja yua. “Quēna tudicaticoaruarāma”, yirā ñaja manima. **14** “Jesús ĩ bajirocacoaboajaquēne, quēna ĩre catioyumi Dios”, yimasiaja mani. Tire masicōari, “Cristore ajitirūnuriarā bajireariarāre quēne tudicatorucumi Dios”, yituoĩaja mani.

15 Ado bajiro m̄uare gotiaja yua, mani ɥɥ Jesús ĩ bueria-rāre ĩ gotimasiorere: Adigodo caticōa ñarājuama, ĩre ajitirū-nucōari, bajireariarā rĳoro juaecobetiruarāja mani. **16** Ado bajiro bajiruaroja ti, Jesús adi macarucuroju ĩ tudivadirotirū-m̄: Dios ĩ rotijare, ángel mesa ɥɥ ĩ ñagōse ocaruyuruaroja. To bajicōari, Dios ya jutiria ti busise ocaruyuruaroja. To cōrone, ō vecaju mani ɥɥ ĩ masune rujiadirucumi. To bajiro ĩ bajirone, ĩre ajitirūnuriarā bajireariarā, quēna tudicaticoaruarāma. **17** Ìna tudicatirone, ñna rāca adigodo catiñarā Cristore ajitirūnuriarāre juarēorotirucumi Dios. To yicōari, oco bueri vatoaju ĩnare juamɥjarotirucumi, “Ìna ɥɥre Cristore bocato” yiḡu. Toju ĩ rāca ñacōa ñarūgūruarāja mani. **18** To bajiri adi yua gotisere ajiri, gāmerā ñagōvariquēnaña m̄ua.

5 **1** “Tirūm̄, tirodo ñaro masu vadirucumi mani ɥɥ”, yimasiaña maja. Jēre tire masiaja m̄ua. **2** “To cōro vadirucumi” masa ñna yimasibetiju vadirucumi. Juarudirimasu ĩ ejarotire quēne, “To cōro juarudiḡu ejaguagu yiḡumi”, yimasibeaja mani. To bajirone bajirucumi Cristo quēne. “To cōro ñaro ejarucumi”, yimasibetiruarāja mani. **3** Ado bajisejua yimasiaja mani: Diore masimena, “Ñie oca mano quēnaro ñaja mani” ñna yiboaro, ñaro t̄sarone gūiose ejaruaroja. Rōmio quēnaro ḡuda so ñaro gajane, ñaro t̄sarone jūnise sore ejaroja, so mac̄ cutirijauj̄ure. Tire bajirone bajiruaroja Jesús ĩ ejaroti quēne. Masiñamanone ti bajijare, rudimasimena ñari, b̄uto rojose t̄m̄uoruarāma ñna masa Diore masimena. **4** M̄uajuama, rētiaroju ñarāre bajiro bajirā me ñaja m̄ua. To bajiri mani ɥɥ ĩ tudivadisere ĩac̄abetiruarāja m̄ua. Juarudirimasu ĩ ejasere ĩacōari, masa ñna ɥcarore bajiro ɥc̄abetiruarāja. **5** Dios ĩ bojase yirā ñari, busuroju ñarāre bajiro bajirā ñaja m̄ua. Dios ĩ bojabeti yirūgūrāma, rētiaroju ñarāre bajiro bajirā ñaama. ^c **6** To bajiri Jesucristo ĩ vadirotire tuoĩamenare bajiro bajirā

^c 5.5 Ro 13.12; Ef 5.8-9.

me ñaja mani. Tire quēnaro t̄oĩayurã, rojosere yiruarã ñaboarine, tire yimena ñaja mani. **7** Ñamire cāniama masa. Gãjerãma, ñamire idimec̄ur̄gũama. **8** Manima, ñnare bajiro bajirã me ñari, busuroj̄u ñarãre bajiro bajiaja. To bajiri, tocãrãcajine quēnase r̄ine yĩnar̄gũroti ñaja, mani ɸj̄u ĩ tudivadirotire t̄oĩayurã. “Manire ejar̄emor̄uc̄umi” mani ɸj̄ure mani yit̄oĩase, mani gãmerã maise suorine v̄ati manire rojose ĩ yirotibosere c̄udibetir̄uar̄aja mani. To yic̄oari, Jesucristo ĩ vadirotire t̄oĩayu t̄ujabetir̄uar̄aja mani, “Rojose t̄am̄uot̄ujabetir̄iaroju mani vaborere manire yir̄etobosar̄uc̄umi” yirã. **9** “Rojose ñna yise vaja rojose t̄am̄uoto” yiḡu me, “Ȳu yarã ñaña m̄ua”, manire yiyumi Dios. Mani ɸj̄u Jesucristo manire ĩ rijabosare suor̄i rojose t̄am̄uot̄ujabetir̄iaroju mani vaborere manire yir̄etobosar̄u, “Ȳu yarã ñaña m̄ua”, manire yiyumi. **10** Manire rijabosayumi Jesús, “Ȳure ajitir̄ũnrã, ȳu rãca ñac̄oã ñar̄gũato” yiḡu. To bajiri tudiejaḡu, mani catic̄oã ñajama, mani rijacoajaquēne manire juam̄jar̄uc̄umi, “Ȳu rãca ñac̄oã ñar̄gũato” yiḡu. **11** To bajiro ti bajijare, tire gãmerã gotiya m̄ua, “Ajivar̄iquēnac̄oari, butob̄usa mani ɸj̄ure ĩre ajitir̄ũn̄uato” yirã. J̄ere m̄ua yĩnasere masiaja ȳu. To bajirone yic̄oã ñar̄gũña.

Pablo ĩ gotiquēnorotire queti

12 Ȳua mairã ado bajiro m̄ua yijama, quēnar̄aroja: M̄uare ũmato ñar̄are Dios ĩ c̄ur̄iar̄are quēnaro r̄uc̄ub̄uoya. **13** Quēnaro m̄uare ejar̄emor̄ũgũama ñna. To bajiri, “Ñamasurã ñaama”, ñnare yir̄uc̄ub̄uoya. To yic̄oari, quēnaro ñnare yiya, “Manire maiaama ñna’ manire yimasiato ñna” yirã. To yic̄oari, ñie oca manone quēnaro ñaña m̄ua.

14 To yic̄oari, m̄ua t̄uana moamenare tudib̄usari ñnare gotiya, “Moato ñna” yirã. Gãjerã, sutiritir̄are “Variquēnato” yirã quēnaro ñnare gotiya. Gãjerã, Cristore quēnaro ajitir̄ũn̄menare, quēnaro ñnare ejar̄emoña. Cristore ajitir̄ũnrã ñajediro rojose yimenane, quēnaro gãmerã gotir̄gũña.

15 Gãji rojose m̄uare ĩ yijama, ĩre gãmebetic̄oãña.

Tocãrãcajine quēnaro gãmerã yiba m̄ua. Masa jedirore to bajiro r̄ine yiba.

16 Tocãrãcar̄ũm̄ne variquēnac̄oã ñar̄gũña m̄ua.

17 Tocãrãcar̄ũm̄ne Diore s̄eniña. **18** Tocãrãcajine, “Quēnaro